



Gabinete Wever - Croes II



ISLAONLINE


Noticia di Gobierno

2023

Dialuna 18 September 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Evelyn Wever-Croes
PROME MINISTER

Gabinete Wever-Croes a priminti, y a cumpli! **EDIFICIO DI BUREAU INTERNE DIENSTEN MAGAZIJN, A WORDO COMPLETAMENTE REMODELA**



Diabierna atardi, Prome Minister Evelyn Wever-Croes a ricibi e yabi di e edificio completamente remodela di Bureau Interne Diensten (BID) / Magazijn. Prome Minister a indica cu tempo el a bira e minister encarga cu BID Magazijn, e la haci un bishita na e edificio, pa mira e circunstancianan cu e empleadonan tabata traha aden. Na e momento ey, el a haci un promesa na cada un di nan, cu e lo percura, como Minister encarga, pa drecha e edificio y hacie un luga di trabou mas eficaz. Awe cu hopi orguyo, Prome Minister ta ricibi e yabi di su promesa haci y cumpli.

Prome Minister a indica cu BID / Magazijn ta e luga encarga pa cumpra y maneha tur producto necesario pa tur departamento di gobierno. E productonan aki ta varia di pen, potlood, y papel, te na productonan di limpieza. Gobierno no solamente a remodela e edificio sino a traha un magazijn hopi mas grandi pa nan, creando oportunidad pa amplia e cantidad di compra. Cu e opcion pa cumpra na cantidadnan mas grandi, e prijs di producto lo baha, faboreciendo asina e caha di gobierno. Tambe esaki lo yuda na sirbi e necesidadnan di tur e departamentonan di gobierno mas eficiente.



“E compromiso di Gobierno ta pa percura cu tur empleado publico tin un espacio confortabel pa traha aden, creando asina un ambiente mas bunita y agradabel. Mi ta spera cu e edificio nobo aki, crea e ambiente y motivacion necesario pa cada empleado sigui sirbi tur e departamentonan di gobierno y comunidad en general, di e mes manera di loke nan ta bin ta haciendo. Mi ta gradici BID, DOW, y VKH (Van Kessel Havenbouw) pa por a haci e proyecto aki posibel. Tambe na cada empleado cu a traha pa años largo den circunstancianan menos agradabel, hopi pabien cu boso edificio nobo y un danki di curason pa e trabou cu boso ta bin ta eherciendo” Prome Minister a expresa.

Continuacion POTRETNAN DI BUREAU INTERNE DIENSTEN/MAGAZIJN....



Prome Minister Evelyn Wever-Croes:

PROME MINISTER DI ARUBA TA DUNA UN SPLICACION DI RAFT Y NEGOSACION CU HULANDA

Den conferencia di prensa di Gobierno di Aruba, dialuna mainta, Prome Minister Evelyn Wever-Croes a elabora riba Raft y negosacion cu Hulanda. Un tema cu ta hopi actual pa motibo cu na Oktober 2023 e debe cu pais Aruba a presta for di Hulanda di AWG. 916 miyon ta vence y sea nos mester paga of refinancia.

HULANDA TA DISPUESTO PA REFINANCIA

Prome Minister a indica cu Hulanda ta dispuesto pa refinancia mescos cu si Aruba lo mester a bay busca e fianza riba mercado internacional y a pone e oferta esey pa (1) un periodo di 20 aña, (2) na interes di 6-8%, probablemente 6.5%. Pero den e oferta aki, riba e placa aki, Hulanda mes ta paga 3% pa e fianza, y ta fia nos e na 6%, pues nan ta gana 3% riba e fianza aki. Si e fianza ta pa 20 aña, nan lo gana mas di 300 miyon florin di nos pagadonan di impuesto. Esaki, Prome Minister a remarca, no ta ayudo segun nos statuut. Ayudo segun statuut ta pa baha e interes. Hulanda den e caso aki lo gana hopi placa riba nos.

CONDICION

Hulanda a indica cu e ta dispuesto pa baha e interes te na 3.2%, pero cu como condicion pa kita e supervision financiero for di man di pais Aruba, Gobierno di Aruba y Parlamento y traspasa esaki pa Reino, den un rijkswet, e RAft. Esaki ta asina na Sint Maarten y Corsou for di aña 2010. Den varios ocacion, Gobierno di Aruba a splica Hulanda cu no tin confiansa cu un rijkswet lo funciona pa Aruba. Un Rijkswet lo kibra e economia di Aruba y lo stroba crecimiento di nos pais. Nos por compara e crecimiento di Aruba cu esun di Corsou y St Maarten cu desde 2010 tin e Rijkswet, por mira e diferencia. Ademá, Corsou y St Maarten a haya dispensacion di nan debe ora nan a haya e rijkswet, siendo cu pa Aruba awor Hulanda kier un rijkswet pero no kier duna ningun dispensacion pa loke ta trata debe di Covid.

ARUBA SURPLUS Y TA PAGANDO DEBE

Aruba ta un pais autonomo, y nos a demostra cu prueba cu e supervision manera e ta awor, den man di Aruba, ta funciona. Aruba ta e unico pais den Reino cu tin surplus, y ta pagando debe. Nos debe nacional ya a baha di 96.6% na 2022, pa



88.3% comienso di e aña aki, y lo sigui baha pa 82% otro aña. E meta ta pa na 2031 e ta na 70%. “Nos no kier pa e desaroyo aki kibra pasobra si nos economia kibra, nos no lo genera surplus y lo no por page debe bek”, Prome Minister a remarca.

EVALUACION DI ALGEMENE REKENKAMER DI HULANDA

Prome Minister a menciona un otro argumento cu ta Algemene rekenkamer di Hulanda cu a evalua e funcionamiento di e rijkswet similar na Corsou y Sint Maarten y a conclui cu e rijkswet ey ta stroba desaroyo socio-economico di e paisnan. Y a urgi Hulanda pa evalua e funcionamiento di Raft. Esey a pone tambe cu Hulanda a dicidi cu lo mester evalua e rijkswet su funcionamiento. E evaluacion aki no a tuma luga ainda. Aruba a pidi tambe pa evalua e LAft y CAft na Aruba. Esaki tampoco a tuma luga ainda. Despues cu e evaluacion aki tuma luga, Aruba lo dicidi tambe den cua direccion lo sigui cu supervision financiero.

“E condicion aki pa baha e interes na 5.1% pa e siguiente dos añanan, y si despues nos duna nan e rijkswet nan lo bahe na 3.2%. Esaki ta un condicion cu Gobierno tawata tin hopi problema cu ne y no por a acepta. Sinembargo pa necesidad nos mester a acepta esaki na fin di aña 2020 y despues atrobe na aña 2021”, Prome Minister a indica.



Ursell Arends
MINISTER

MAS CU SETENTA BAKI DI DESPERDICIO COLECTA DURANTE BAKI DEN BARIO NA SANTA CRUZ



Diasabra ultimo a tuma luga e di dos edicion di Baki den Bario na Santa Cruz. Baki den Bario, cu ta forma parti di campaña nacional 'Limpi Limpi', ta un evento unda ta pone baki di desperdicio na diferente districtonan rond di Aruba.

E meta di e evento aki ta pa conscientisa nos poblacion riba separacion di desperdicio y e importancia di esaki. Pues ora di separa desperdicio, nos ta yuda e procesamiento di reciclahe cana mas eficiente y alabes, ta percura pa menos contaminacion den nos medio ambiente.

Diasabra ultimo entre 7'or pa 11'or di mainta un cantidad grandi di persona y segun nos calculacionnan alrededor di 500 auto, a bin haci uzo di e oportunidad pa trece desperdicio pa procesamiento. A logra colecta alrededor di 70 baki di desperdicio separa cual entre nan desperdicio di construccion, metal, e-waste, greenwaste, bulkwaste, taira y hasta carton.

Ministerio di Naturalesa ta sumamente contento cu e cantidad significante di desperdicio cu a ser colecta y awor lo por wordo procesa debidamente. Esaki ta desperdicio di cual un gran parti por a termina den nos naturalesa.

E recepcion excepcional di Baki den Bario ta un muestra cu nos comunidad ta dispuesto di adopta practicanan sostenibel. Separacion di desperdicio ta un concepto relativamente nobo den nos comunidad y ta algo cu lo tuma cambio di mentalidad pa por implementa structuralmente.



Minister Arends ta recorda tur esnan cu ta desea di haci uzo di Baki den Bario pa haci e preparacionnan necesario den diano binidero. Den e manera ki por evita di yega laat na e evento y no logra deposita desperdicio. Esnan cu a prepara di antemano a hasta logra pasa Baki den Bario mas cu un biaha entre 7'or pa 11'or di mainta.

Tambe un recordatorio cu durante cada evento di Baki den Bario lo tin un stand di FPNC (Fundacion Pa Nos Comunidad) unda cu lo acepta articulonnan den bon estado cu por haya di dos uzo cerca un doño nobo. Articulonnan acepta ta, entre otro, muebles, paña y co'i hunga.

Adicionalmente, Serlimar lo tin un stand unda su clientenan por bin regla nan cuenta di pago y solicita transportacion di nan desperdicio den caso cu no por logra trece. E servicio di transportacion di desperdicio, tambe ta telefonicamente.

E siguiente edicion di Baki den Bario lo tuma luga dia 7 di october den distrito di Noord y lo conitua te dia 16 di december 2023 den tur otro distrito. Pa mas informacion tocante e desperdicio cu ta wordo acepta y e fechanan por bishita <https://trashtocasharuba.org/limpilimpi>.




SIMAN PASA TABTA UNO HOPI OCUPA PA MINISTERIO DI TURISMO Y SALUD

Manera ta custumber Minister di Turismo y Salud Publico ta duna un resumen di e siman tras di lomba. Siman pasa tabata un siman ocupa caminda tabata tin e aña Parlamentario cu e tuma lugar. Tambe a anuncia e continuacion di e proyecto di Malmok Boardwalk.



Diamars mainta Minister Oduber a atende e apertura di e di 38 aña di aña Parlamentario. Den esaki nos Gobernador a hiba un discurso hopi elocuente y na su lugar den e ocacion aki. Den su discurso Gobernador a enfoca riba e perspectivanan economico cu ta wordo brinda pa e maneho di Gobierno. E refleha tambe riba e retonan cu tin pa cu salud mental. A papia di e crecimiento economico y tambe di e innovacion cu tin den cuida medico. Gobernador a trece un mensahe positivo di trahamento hunto.



Diahuebs Minister Oduber a duna un conferencia di prensa caminda e la anuncia e continuacion di e proyecto di Malmok Boardwalk. Un proyecto cu a wordo parti den 6 diferente fase. E fase 1 y 2 di e proyecto aki ya caba a keda entrega. Awor lo bay continua cu fase 3 y 4 di e proyecto aki. FASE 3 (2023). Den fase 3 di e proyecto di Malmok Boardwalk lo bay embece e area na comienso di e boardwalk y unda tin e pasarela di palo cu flora, pergola y banki. FASE 4 (2024). Den fase 4 di e proyecto lo bai conecta e boardwalk cu Ritz Carlton plantando palmanan di coco na banda.

Despues lo bay continua cu e fase 5 y 6 caminda lo bay conecta e boardwalk di Marriott te cu Radisson Blue. Pa asina por entrega henter e proyecto manera inicialmente a wordo planifica den diferente fase. E mandatario ta hopi contento cu lo bay continua cu fase 3 y 4. E meta di e boardwalk semper tabata pa mehora e seguridad di e area pa ambos turista y localnan. Danki na e boardwalk tur hende por ta mas sigur ora nan, sea cana of core bais riba e caminda panoramico aki di nos isla.

Un otro bunita proyecto cu ta wordo financia pa Tourism Product Enhancement Fund (TPEF).

Minister Dangui Oduber:

DEN SIMPOSIO DI CARDIOLOGIA A REFLEHA RIBA E PROME 5 AÑA DI "INTERVENTIE CARDIOLOGIE" NA ARUBA

Diasabra mainta Minister di Turismo y Salud Publico sr. Dangui Oduber a haci apertura di e simposio di cardiologia. Un simposio hopi importante caminda nan a splica con Percutane Coronaire Interventie "PCI" a bira un realidad na Aruba desde aña 2018 y cuanto pashent a wordo trata haciendo uzo di e tecnologia aki.

PCI ta e nomber general pa trata arterianan coronario estrechá usando hermentnan riba e punto di un catheter. E introduccion di proceduranan di PCI na Aruba tabata tin un impacto substancial den nos sistema di cuidu di salud. Minister Oduber ta orguyoso di bisa cu e desaroyo aki a y ta dunando nos localnan acceso na e miho cuidu coronario cu tin. Minister Oduber a sigui bisa cu prome cu aña 2018 hopi ta esnan cu mester a bay busca nan salud na Colombia ora ta trata di PCI. Awor cu tur esaki ta wordo haci na Aruba mes, e pashent no mester bay den exterior mas, e ta keda mas serca di su famia. E pashent ta sinti su mes mas confortabel cu ta yuda hopi den e proceso di recuperacion. Tambe e PCI local a yuda na mitiga e crecemento di gastonan di AZV relaciona cu e crecemento den necesidad na e tipo di tratamento aki causa dor di entre otro e embehesemento di nos pueblo.

Di inicio Ministerio di Salud Publico a sostene e vision di dr. Lacle pa realisa un centro di PCI. E partnership cu Amsterdam UMC y Onze Lieve Vrouwe Gasthuis (OLVG) sigur tabata hopi importante pa realisa e vision aki. Danki na e centro aki a scapa hopi bida cu PCI cu por a wordo haci aki na Aruba mes.

E mandatario a gradici dr. Lacle pa su vision y iniciativa. Un danki tambe na tur e cardiologonan, tur e profesionalnan cu ta traha den e centro pa tur e bida nan cu nan a scapa durante e ultimo 5 añanan.

Finalmente e Minister Oduber a gradici dr. Lacle y dr. Dennert pa organisa un bunita simposio. E tabata hopi interesante y informativo, e ta demostra e calidad di cuidu cu nos ta ofrece na Aruba.





MINISTER ENDY CROES A FIRMA UN MEMORANDUM OF UNDERSTANDING (MOU) CU EDUCATIONUSA

Brindando mas oportunidad na nos studiantenan pa continua cu nan estudio avansa na Merca



Diahuebs atardi, den un conferencia di prensa a tuma luga relansamento di EducationUSA. Na mes un momento Minister Endy Croes a firma un Memorandum of Understanding (MoU) cu Consul General di Merca staciona na Curaçao, Sra. Margy Bond. E acuerdo aki ta habri porta pa e studiantenan di Aruba y ta brinda nan mas oportunidad pa por continua estudio avansa na merca pa un bon tarifa.

EducationUSA Aruba ta un centro internacional cu ta brinda e studiantenan cu ta continua cu nan estudio avansa na Merca conesho, informacion, guia y sosten. EducationUSA Aruba tin un kantoor na Aruba den e edificio di JFK Center. Tambe presente na e ocasion aki, tabata Prome Minister Evelyn Wever – Croes, directora di Departamento di Enseñansa Sra. Anne Marie Proveyer – Groot, inspector general di Enseñansa Sr. John Hessen, miembronan di Consul General di Curaçao,

conseheronan di EducationUSA y demas invitadonan special. Durante e ceremonia Minister Endy Croes y Consul General di Merca Sra. Margy Bond a hiba palabra.

Minister Endy Croes a enfatisa cu e MoU aki, lo duna espacio pa traha hunto, stimula, inspira y motiva nos studiantenan cu tin e posibilidad pa continua cu nan estudio na Merca. Tambe, promove y/of crea un plataforma mas grandi y oportunidad pa nos studiantenan por continua nan estudio avansa na Merca. Na Merca e programanan ta diferente y progresivo. Sigur esaki ta yuda ora e estudiante finalisa nan estudio pa e “brain gain”. E studiantenan ta bin bek pa contribui cu Aruba y yuda nos pais sigui desaroya. “Esaki ta e vision y nos ta contento cu e firmamento di e MoU aki”, Minister Endy Croes a expresa. Pa conclui, mandatario di Enseñansa ta felicita Pueblo di Aruba, alabes ta gradici Consul General Sra. Margy Bond y su ekipo.

Minister Endy Croes:

COMPLEHO DEPORTIVO GUILLERMO PROPERO TRINIDAD NA DAKOTA CU YERBE ARTIFICIAL COMPLETAMENTE NOBO

**E compania profesional di Merca AstroTurf a presenta nan trabou na
Minister di Deporte**

Recientemente, Minister di Enseñansa y Deporte Endy Croes a haci un “sight visit” na Compleho Deportivo Guillermo Prospero Trinidad na Dakota. Manera ta conoci, e stadion na Dakota ta den proceso di renobacion desde algun luna atras. Tin hopi trabou ta tumando luga na e stadion y ta trahando cu ful swing pa por keda cla completamente cu e trabou e aña aki. Un compania profesional di Merca a bin Aruba pa a aloca e yerbe artificial nobo na Compleho Deportivo Guillermo Prospero Trinidad.

Diahuebs ultimo, e compania profesional AstroTurf a finalisa cu nan trabou y entrega Minister Endy Croes un certificacion cu garantia di ocho (8) aña pa e trabou cu nan a haci. Tambe presente na e ocasion special aki tabata Ministerio di Deporte e representantenan di Fundacion Facilidatnan Deportivo (FFD) y e empleadonan cu a haya training pa e mantencion di e yerbe artificial. Otro siman e representantenan di FIFA lo ta na Aruba pa certifica e trabou aki. Minister Endy Croes

ta gradici AstroTurf pa e trabou sublime cu nan a haci. Sigur cu esaki ta un tremendo noticia pa nos deportistanan y pa e federacion di futbol. Masha pabien Aruba!





ENCUESTA FORSA LABORAL 2023



Entrante 15 di september 2023 te cu fin di october 2023, Oficina Central di Estadistica (CBS) conhuntamente cu Departamento di Labor y Investigacion (DAO) y Centrale Bank di Aruba (CBA) lo ehecuta e Encuesta di Forsa Laboral 2023 (LFS2023). E LFS2023 tin como meta principal pa haya un bista detaya y actual di e mercado laboral di Aruba. Tambe lo colecta informacion di e caracteristicanan di personanan cu ta participa y tambe di esnan cu no ta participa na e mercado laboral. Di e forma aki por haci analisis profundo di e composicion di e mercado laboral di Aruba y tambe por compila indicadornan importante, manera e.o. e tasa di empleo y desempleo na Aruba, e grado di participacion di hende homber y hende muhe na e mercado laboral y e nivel di educacion di esnan cu ta emplea y no ta emplea.

Un total di 4.050 hogar lo wordo bishita. Un team di 27 encuestador lo acerca un total di 4.050 hogar cu a wordo selecciona for di e base di datonan di adres di CBS. E hogarnan aki ta parti rond di Aruba. Encuestadornan lo acerca hogarnan individualmente durante di un periodo di 6 siman. Cuminsando for di 8'or di mainta encuestadornan lo ta hasiendo encuesta te cu 8'or di anochi. Na momento di acerca un hogar, un encuestador mester identifica su mes cu un badge. Riba e badge aki tin su nomber, su potret, e logo di CBS, DAO, CBA y e LFS2023. Tur encuestador lo haya tambe un poloshirt cu e logo di LFS2023. Si acaso un encuestador no tin e poloshirt di LFS2023 bisti, semper e por identifica su mes cu e badge.

E cuestionario di LFS2023 Na comienso di e cuestionario lo haci algun pregunta basico na tur persona den e hogar. Despues, lo sigui cu preguntanan specifico tocante e forsa laboral. E preguntanan aki lo wordo haci solamente na personanan di 15 aña bay ariba. E motibo tras di esaki ta cu segun principianan di e Organizacion Internacional di Labor (ILO), tur persona 15 aña bay ariba ta wordo considera como parti di e forsa laboral di un pais. Mester enfatisa cu e ta sumamente importante pa tur persona di 15 aña of mas participa na e encuesta, sea nan ta emplea, no emplea of nan no ta activo riba e mercado

laboral (por ehempel pa motibo cu nan ta bayendo scol of, den caso di adultonan mayor, ya nan ta pensiona). Di e forma aki por haya un bista completo di tur esnan cu ta forma parti di e forsa laboral di Aruba.

E cuestionario ta contene preguntanan riba e temanan di importancia pa e mercado laboral, entre otro: educacion, funcion, sector na unda ta emplea, orarionan di trabou, etc. Un tema nobo cu a wordo inclui den e cuestionario di e LFS2023 ta e balansa entre trabou y tempo liber/tempo pa famia. E cuestionario lo wordo completa den un forma digital (pa medio di un tablet).

Privacidad Mester enfatisa cu tur informacion lo wordo procesa anonimamente y lo wordo publica solamente den forma agrega. E informacion colecta lo yuda esnan encarga cu stipulacion y ehecucion di maneho riba tereno laboral pa haci esaki cu mas efectividad y basa riba datonan actual di Aruba. E informacion colecta tambe lo sirbi pa informa esnan den sector priva como tambe esnan den sector di enseñansa y investigacion, y e publico en general di e desaroyonan mas recien riba e mercado laboral di Aruba.

E privacidad di cada hogar y cada persona cu ta participa na e LFS2023 ta wordo garantiza pa e team di investigacion (CBS, DAO y CBA). E informacion colecta lo contribui na duna un bista completo di e desaroyonan actual riba e mercado laboral di Aruba. Pesey e participacion di cada hogar y cada persona cu wordo acerca pa nos team di encuestadornan ta esencial!

Nos ta gradici tur hogar y tur persona di antemano pa nan participacion na e LFS2023. Pa mas informacion tocante e Encuesta di Forsa Laboral 2023 por tuma contacto libremente cu e team di CBS/DAO di dialuna pa diabierna durante ora di oficina (7:30 am - 4:30 pm), na number di telefoon 524-7433/523-7720 of por manda un e-mail na cbs@setarnet.aw of via directiearbeid@aruba.gov.aw

PROYECTO 'ARUBAVERSE 2.0'

TA BAY SAN NICOLAS



Departamento di Asuntunan Economico, Comercio y Industria y su unidad Exprodesk, segun maneho economico di Minister di Economia, Comunicacion y Desaroyo Sostenibel, sr. Geoffrey Wever, ta organisa den colaboracion cu Full Stack Vision FND e proyecto 'Arubaverse 2.0' na San Nicolas. E proyecto lo tin varios tayer/ meetups mensualmente y lo termina na maart 2024. E prome meetup na San Nicolas lo tuma luga diaranson 27 di september na The Hub at San Nicolas (B. v/d Veen Zeppenfeldstraat 70-72), di 6:30pm pa 8:00pm. Participacion ta gratis y e idioma lo ta papiamento y ingles. Pa por participa mester registra na: <https://bit.ly/arubaverse>

Proyecto 'Arubaverse 2.0'

Eproyecto 'Arubaverse 2.0' ta wordo organisa pa turentrepreneur y comerciante local. Durante e meetups di 'Arubaverse 2.0', participantenan lo ricibi informacion tocante 'Free Artificial Intelligence (AI) tools'; 'digital assets latest trends'; con AI por yuda bo adapta of crea un modelo comercial nobo; 'user-centric design principles'; conocimiento di 'computing systems' y nan aplicacionan practico; mercadeo digital; 'data-driven decision-making'; simplificacion di conceptonan di algoritmo y structuranan di data; 'blockchain'; e futuro di e pagonan digital; bienes digital/NFT y mucho mas!

Tambe durante henter e proyecto ta pidi tur participante pa bin cu nan laptop pa asina experiencia pa nan mes den un forma practico con pa aplica inmediatamente tur loke nan a siña.

Oradornan local y internacional

Lo tin varios oradornan local y internacional durante e proyecto aki. Pa dia 27 di september 2023, lo tin e oradornan local kende ta Media and R&D Coordinator, sr. Alexander Lejuez y tambe sr. Bruce Harms di Full Stack Vision FND.

Pa mas informacion over di e proyecto 'Arubaverse 2.0', por tuma contacto cu sra. Sharon Meijer via: s.meijer@deaci.aw



Ministerio di Asuntunan Economico,
Comunicacion y Desaroyo Sostenibel

arubaverse.io

Version 2.0





Media and R&D Coordinator
Alexander Lejuez

A Practical Guide to AI
In Your Daily Work Environment
Date: **September 27, 2023**
Location: **THE HUB | San Nicolas**
Time: **18:30-20:00**



CONCURSO di Pintamento 2023



Bo Kier Participa?

1. Participacion ta gratis! Tur muchanan di scol basico por participa (1e - 6e klas)
2. Si bo no a ricibi e formulario na scol, bo por download e formulario via: specialprojectsaruba.org
3. Tarea 1: Duna bo cacho un number
Tarea 2: Pinta un (of mas) cacho den cura
4. Bo pintura mester ta uno original y creativo, e pintura mester ilustra un cacho den cura y bo por incorpora mas di e puntonan di e Ley di Cacho den dje
5. E pintura mester ta den color y mester ta pinta door di e mucha mes
6. Un (1) pintura pa cada participante; entrega bo formulario no mas tarda cu dia 22 di september 2023 na Bestuurskantor Oranjestad, na HBK San Nicolas, of na e MFA mas cerca dibo
7. E ganadornan di cada klas lo wordo anuncia dia 4 di oktober 2023 Dierendag riba e pagina facebook di Gabinete Wever-Croes
8. Lo tin un regalito pa tur e ganadornan cu lo wordo entrega fin di oktober

Ley Di Cacho!



- Bo cacho mester ta den cura y no riba caya
- Bo cacho mester por tin suficiente espacio pa e por move den su cura y mester por sconde pa awasero, biento y solo, dus bo cacho mester tin un casita of mester por bay bou un dak
- Bo mascota mester haya awa limpi pa e bebe y cuminda fresco y adecuado, dus duna bo cacho cuminda di cacho
- Ora bo kier keiro cu bo cacho, mara un liña na su banchi pa bo tene, pa por tin control riba dje y mester piki su sushi si e pupu ora boso keiro 🍌
- Hiba bo mascota dokter di bestia ora e ta birando malo, ora e mester haya su vacuna, y ora e mester opera, por ehempel pa bo cacho no haya puppies



Informacion di Participante



Number y Fam: _____
Fecha di Nacimiento: _____ Edad: _____
Scol: _____ Klas: _____
Number di Telefon di Mayor: _____



Un nomber faborito pa bo cacho: _____

Area pa pinta ↓

Area pa pinta ↓



Union ta e forsa di un ekipo, famia y
nacion pa logra cada meta pa e
bienestar humano. Ban sigui den
positivismo pa engrandece nos pais.